

四庫全書

子部

欽定四庫全書

子部

太平御覽卷一百

十八至
二十三

詳校官侍讀學士_臣沈咸熙

員外郎_臣牛稔文覆勘

總校官降調編修_臣倉聖脈

校對官助教_臣胡予襄

謄錄監生_臣王時發

欽定四庫全書

太平御覽卷一百十八

宋 李昉等 撰

偏霸部二

吳孫堅

孫策

孫權

孫亮

孫休

孫皓

孫堅

吳志曰堅字文臺吳郡富春人蓋孫武之後也少為縣吏府召署為校尉會稽妖賊許昌起於句章堅以郡司馬募兵精勇得千餘人與州郡合討破之刺史臧旻列上功狀詔書除堅鹽漬丞又徙下邳丞中平元年黃巾賊張角起於魏郡漢遣車駕將軍皇甫嵩中郎將朱雋將兵討擊之雋表請堅為佐軍司馬堅又募精兵合千許人與雋併力奮擊所向無前拜堅別部司馬中平三年遣司空張溫西討邊章韓遂溫表請堅叅軍事屯長

安溫以詔書召董卓卓良久乃詣應對不順堅數卓三
罪勸溫斬之溫不忍發舉軍還拜堅議郎時長沙賊區
星自稱將軍以堅為長沙太守克破星等漢朝錄前後
功封堅烏程侯靈帝崩董卓專擅朝政諸州郡並舉義
兵討卓堅亦舉兵北至南陽衆數萬人南陽太守張咨
晏然自若堅牽咨於軍門斬之郡中震慄無求不獲前
到魯陽與袁術相見術表堅行破虜將軍領豫州刺史
遂治兵於魯陽城進軍討卓卓憚堅猛壯乃遣將軍李

侏等求和親堅曰卓逆天無道蕩覆王室今不夷汝三族則吾死不瞑目豈與汝和親耶復進軍大谷距雒九十里卓尋徙都西入關焚雒邑堅至雒修諸陵平塞卓所發掘訖引軍往魯陽初平三年術使堅征荊州擊劉表表遣黃祖逆於樊鄧之間堅破之追渡漢水遂圍襄陽單馬行峴山為祖軍士所射殺追謚武烈皇帝兄子賁帥將士衆還就術術復表賁為豫州刺史堅四子策權翊匡

孫策

吳志曰策字伯符堅初興義兵策母徙居舒與周瑜相友江淮間人咸向之堅薨還葬曲阿已乃渡江居江都策舅吳景時為丹陽太守策乃載母從曲阿興平元年謁袁術術甚奇之以堅部曲還策太傅馬日磾持節安集關東以禮辟策表拜懷義校尉術嘗嘆曰使術有子如孫郎死復何恨先是劉繇為揚州刺史揚州舊治壽春壽春術已據之繇乃渡江治曲阿時吳景尚在丹陽

策從兄賁又為丹陽都尉繇至皆迫逐之景賁退舍漂陽繇遣樊能等屯江津張英屯當利以拒術術以景為督軍中郎將與賁共將兵擊英等連年不克策乃說術乞助景等平定江東術表策為折衝校尉行殄寇將軍兵纔千餘騎數十疋賓客願從者數百人比至漂陽衆五六十策又徙母阜陵渡江轉鬪所向皆破莫敢當其鋒而軍令整肅百姓懷之策為人美姿顏好笑語闊達聽受善于用人是以士民樂為致死劉繇軍遁逃諸郡

守皆捐城奔走吳人嚴白虎等衆各萬餘處處屯聚策引兵渡浙江據會稽乃攻破虎等盡更置長吏策自領會稽太守彭城張昭廣陵張紘秦松等為謀主時袁術僭號策以書責而絕之曹公表策為討逆將軍封為吳侯後術死長史楊弘大將張勲等將其衆欲就策廬江太守劉勲要擊悉虜之策輕軍晨夜襲拔廬江勲衆盡降勲與數百人自歸曹公是時袁紹方強而策并江東曹公乃以弟女配策小弟匡又為子彰取貢女又命揚

州刺史嚴衆舉權茂才建安五年曹公與袁紹相拒于官渡策陰謀襲許迎漢帝密治兵未發會為故吳郡太守許貢客所刺傷瘡甚集張昭等謂曰中國方亂以吳越之衆三江之固足觀成敗公等善相吾弟呼權佩以印綬至夜卒時年二十六追謚曰長沙桓王

孫權

吳志曰孫權字仲謀兄策既定諸郡時權年十五以為陽羨長郡察孝廉舉茂才行奉義校尉漢以策遠修貢

職遣使者劉琬加錫命琬語人曰吾觀孫氏兄弟雖各才秀明達然皆祿祚不終唯仲弟孝廉形神奇偉體骨不恒有大貴之表年又最壽策薨以事授權權哭未及息策長史張昭謂權曰孝廉此寧哭時耶扶令上馬使出巡軍曹公表權為討虜將軍領會稽太守屯吳建安八年權西伐黃祖破其舟軍玄德表權行車騎將軍領徐州牧十六年權徙治秣陵明年城石頭改秣陵為建業二十一年冬曹公攻濡須權令都尉徐祥詣曹公報

使修好誓結婚姻二十三年十月權將如吳親乘馬射虎馬為虎所傷權投以雙戟虎却廢常從張世擊以戈獲之二十四年關雲長圍曹仁于襄陽權內憚外欲以為己功飛牋于曹公乞討雲長閏月權與戰遂定荊州曹公表權為驃騎將軍持節領荊州牧封南昌侯權自公安都鄂改名武昌魏文帝踐祚加權九錫封為吳王初權外託事魏而誠心不款魏欲遣侍中辛毗尚書桓階往與盟誓并徵任子權辭讓不受遂改元為黃武元

年臨江拒守權使太子大夫鄭泉聘蜀主于白帝使復
通好猶與魏文帝相往來至後年乃絕七年二月公卿
百司皆勸上尊號夏四月夏口武昌並言黃龍鳳凰見
丙申祭南郊即皇帝位是日大赦改元黃龍元年追尊
父破虜將軍堅為武烈皇帝母貝氏為武烈皇后兄討
逆將軍策為長沙桓王六月與蜀為盟九月遷都建業
嘉禾四年魏使以馬求易珠璣翡翠玳瑁權曰此皆孤
所不用而可得馬何苦而不聽其交易赤烏七年步騭

朱然各上疏云自蜀還者咸言蜀欲背盟與魏交通宜
為之備權曰吾待蜀不薄無所負之人言若不可信朕
為諸君破家保之蜀竟無謀如權所籌太元元年權祭
南郊還寢疾二年四月薨時年七十一諡曰大皇帝葬
蔣陵

吳志評曰孫權屈身忍辱任才尚計有句踐之奇洵人
之英傑故能自擅江表成鼎峙之業然性多嫌忌果於
殺戮暨臻末年彌以滋甚至于讒說殄行脣嗣廢斃豈

所謂貽厥孫謀以燕翼子者哉後中葉陵遲遂致覆國
未必不由此也

吳志曰權自陸口遂征合肥未下徹軍還兵皆就路權
與凌統甘寧等在津北為魏將張遼所襲統等以死得
權權乘駿馬越津渠得去

獻帝春秋曰張遼問吳降人向有紫髯將軍長上短下
便馬善射是誰降人荅曰是孫會稽也張遼及樂進相
遇言不早知之急追即獲舉軍嘆恨

吳歷曰曹公出濡須權數挑戰公堅守不出權乃自乘船從濡須口入公見舟船艨艟仗軍伍整肅喟然嘆曰生子當如孫仲謀權劉景昇兒子豚犬耳權為賤與曹公說春水方生公宜速去別紙言足下不死孤不得安曹公語諸將曰孫權不欺孤乃撤軍還

江表傳曰堅為下邳丞時權生方頤大口目有精光堅異之以為有貴象及堅亡策起事江東權常隨從性度弘朗仁而多斷好養俠士始知名侔於父兄矣每叅問

計謀策甚奇之自以為不及也每請會賓客顧權曰此諸軍之將軍也

孫亮

吳志曰孫亮字子明權少子權春秋高而亮最少故尤留意姊金氏公主嘗諧太子和子母心不自安因倚權意欲豫自結數稱述金尚女勸權為亮納為妃赤烏十三年和廢權遂立亮為太子以金氏為妃權薨太子即尊位大赦改元建興元年冬十月太傅諸葛恪率軍過

巢湖城東興十二月魏使將軍諸葛誕等出騎七萬圍東興恪以大兵赴敵大破魏軍太平元年以從弟偏將軍緄為侍中武衛將軍領中外諸軍事二年四月亮臨正殿大赦始親政事又料兵子弟十八已下十五已上得三千餘人選大將子弟年少有勇力者為之將帥亮曰吾立此軍欲與之俱長日於苑中習馬三年亮以緄專恣與太常全尚將軍劉承謀誅緄九月緄以兵取尚遣弟恩攻殺承於蒼龍門外召大臣會宮門黜亮為會

稽王時年十六

吳歷曰亮出西苑食生梅使黃門至中藏取蜜蜜中有鼠屎召問藏吏吏叩頭亮問吏曰黃門從汝求蜜耶吏曰向求實不敢與黃門不服侍中刁玄張邠啟黃門藏吏辭語不同請付獄推亮曰此易知耳令破鼠屎屎裡燥亮大笑謂玄邠曰若久在蜜中中外當俱濕今裡燥必黃門所為黃門首服左右莫不驚悚

孫休

吳志曰孫休字子烈權第六子也年十三時從中書郎
謝慈郎中盛冲受學太元二年正月封琅琊王居虎林
四月權薨休弟亮承統諸葛恪秉政不欲諸王在濱江
兵馬之處徙休于丹陽郡太守李衡數以事侵休休上
書求徙他郡詔徙會稽居數歲夢乘龍上天顧不見尾
覺而異之孫亮廢孫綝使宗正孫楷與中書郎董朝迎
休休初聞意甚疑楷朝共述所以奉迎本意留一日二
夜遂發行至曲阿有老公于休叩頭曰事久變生天下

喁喁願陛下速行休善之是日進及布塞亭武衛將軍
孫恩行丞相事率百寮以乘輿法駕迎於永昌亭絀以
兵千人迎於半野拜於道側休下車答拜即日御正殿
大赦改元永安元年冬絀一門五侯皆典禁兵權傾人
主休聞絀逆謀陰與張布圖計十二月戊辰百寮朝賀
公卿升殿詔令武士縛絀即日伏誅五年以衛將軍濮
陽興為丞相休以丞相興及左將軍張布有舊恩委之
以事布典宮省興關軍國休銳意於典籍欲畢覽百家

之言又好射雉春夏之間常晨出夜還唯此時舍書休
欲與博士祭酒韋曜博士盛冲講論道藝曜冲素皆切
直布恐入侍發其陰失令已不得專國因妄飾說以拒
遏之休答曰孤之涉學羣書略徧所見不少也其明君
暗主奸臣賊子古今賢愚成敗之事無不見也今曜等
入但欲與講論書耳不為從曜等始更受學也縱復如
此亦何所損君特當以曜等恐道臣下奸變之事以此
不欲令入耳如此之事孤已自備之不須曜等然後乃

解也此都無所損君意特有所忌故耳布得詔陳謝重
自序述又言懼妨政事休答曰書籍之事患人不好好
之無傷也此無所為非而君以為不宜是以孤有所及
耳王務學業其流各異不相妨也不圖君今日在事更
待此於孤也良所不敢布拜表叩頭休答曰聊相開悟
耳何至叩頭乎如君之忠誠遠近所知往者所以相感
今日之寃寃也詩云靡不有初鮮克有終終之實難君
其終之初休為王時布為左右將督素見信愛及至踐

祚厚加寵待專擅國勢多行無禮自嫌瑕短懼暉冲言之故尤患忌休雖解此旨心不能悅更恐其疑懼竟如布意廢其講業不復使冲等入七年七月休薨時年三十謚曰景皇帝

江表傳曰休寢疾日不能言乃手書呼丞相濮陽興入令子寧出拜之休把興臂指寧以托之也

襄陽記曰李衡為丹陽太守時休在郡治衡數以法繩之妻習氏每諫衡不從會休立衡懼謂妻曰不用卿言

以至於此遂欲奔魏妻曰琅琊王素好善慕名方欲自顯於天下終不以私嫌殺君明矣可自囚詣獄如此乃當逆見優饒非但直活而已衡從之果得無患又加威遠將軍授以啟戟

吳志曰休詔曰丹陽太守李衡以往事之嫌自拘有司夫射鉤斬祛在君為君遣衡還郡勿令自疑

孫皓

吳志曰孫皓字元宗權孫和之子也一名彭祖字皓宗

孫休立封皓為烏程侯遣就國西湖民景養相皓當大貴皓隱而不敢泄休薨是時蜀初亡而交趾攜叛國內震懼貪得長君左典軍萬或者為烏程令與皓相善稱皓才識明斷是長沙桓王之儔也又加之好學奉尊法度屢言之於丞相濮陽興左將軍張布布興說休妃太后朱欲以皓為嗣朱曰我寡婦人安知社稷之慮苟吳國無隕宗廟有賴可矣於是遂迎立皓時年二十三改元大赦皓既得志麓暴驕盈多忌諱好酒色大小失望

與布竊悔之或以語皓十一月誅興布天紀三年冬晉命鎮東將軍司馬佃安東將軍王渾揚州刺史周浚太尉賈充為大都督量宜處要進軍以討之初皓每宴會羣臣無不咸令沉醉置黃門郎十人特不與酒侍立終日為司過之吏宴罷之後各奏其闕失罔有不舉大者即加威刑小者輒以為罪後宮千數而采擇未已又激水入宮宮人有不合意者輒殺流之或剝人之面或鑿人之目岑昏險譟貴幸致位九列好興功役衆患所苦是

以上下離心莫為皓盡力蓋積惡已極不復堪命故也
晉軍所至則土崩瓦解而王濬順流將至司馬仙王渾
皆臨近境皓用光祿勳薛瑩中書令胡冲等計分遣使
奉書於濬濬最先到於是受皓之降解縛焚櫬延請相
見仙以皓致印綬於己遣使送皓舉家西遷以太康元
年五月丁亥集于京邑四月詔賜號為歸命侯進給衣
服車乘田三十頃歲給穀五千斛錢五十萬絹五百疋
綿五百斤皓太子瑾拜中郎五年皓死於洛陽

吳錄曰
皓以四

年十二月死
時年四十二

世說曰晉武帝問孫皓曰聞南方人好作爾汝歌頗能不時方飲酒因舉觴勸帝而言曰昔與汝隣國今為汝作臣上汝一杯酒令汝壽長春帝悔之

吳志曰皓之淫刑所濫殞斃流黜者蓋不可勝數是以羣下人人惴恐虐用其民窮淫極侈宜其要首分離以謝百姓既蒙不死之詔復加歸命之寵豈非曠蕩之恩過厚之澤也哉

太平御覽卷一百十八

欽定四庫全書

太平御覽卷一百十九

宋 李昉等 撰

偏霸部三

敘偏霸

前趙劉淵

劉聰

劉曜

敘偏霸

晉書載記叙曰劉元海以惠帝永興元年據離石稱後

漢九年石勒據襄國稱趙張氏先據河西是歲自石勒
後三十六年也重華自稱涼王後一年冉閔據鄴稱
魏後一年苻健據長安稱秦慕容氏先據遼東稱燕是
歲自苻健後一年也儁始僭號後三十一年後燕慕容
垂據鄴後二年西燕慕容冲據阿房是歲也乞伏國仁
據枹罕稱秦後一年慕容永據上黨是歲也呂光據姑
臧稱涼後十二年慕容德據滑臺稱南燕是歲也禿髮
烏孤據廣川稱南涼段業據張掖稱北涼後三年李玄

盛據燉煌稱西涼後一年沮渠蒙遜殺段業自稱後涼
四年譙縱據蜀稱成都王後二年赫連勃勃據朔方稱
大夏後二年馮跋殺離班據和龍稱北燕提封天下十
喪其八莫不龍旌帝服建社開枋華夷咸暨人物斯在
或纂通都之鄉或擁數州之地雄圖內卷師旅外并窮
兵山於勝負盡人命於鋒鏑其為戰國者一百三十六
載抑元海為之禍首云

劉淵

崔鴻十六國春秋前趙錄曰劉淵字元海新興匈奴人
先夏后氏之苗裔曰淳維世居北狄千有餘歲至冒頓
襲破東胡西走月氏服丁零內侵燕代控弦四十萬漢
祖患之使劉敬奉公主以妻冒頓約為兄弟故子孫遂
冒姓為劉氏建武初入居西河美稷後漢中平中單于羗
渠使子於扶羅將兵助漢討平黃巾會羗渠為國人所
殺於扶羅以其衆留漢自立為單于屬董卓之亂寇掠
太原河東屯於河內於扶羅死弟呼厨泉立以於扶羅

子豹為左賢王即元海之父也魏武分其衆為五部以
賢王豹為左部帥其餘部帥皆以劉氏為之太康中改
置都尉雖分屬五部皆家于晉陽汾澗之濱豹妻呼延
氏魏嘉平中祈子於龍門有一白魚頂有一角軒轅躍
鱗而至祭所久之乃去巫覡皆異之曰此嘉祥也其夜
夢所見魚變為人左手把一物大如雞子光景非常授
呼延氏曰此是日精服之生貴子寤以告豹豹曰吉徵
也自是十五月而生淵淵生左手有文曰淵海遂以為

名幼而好學不舍晝夜常謂同門生朱紀范隆等曰吾
每觀書傳常鄙隨陸無武絳灌無文一物之不知
固君子恥之也二生遇高皇不能建封侯之業兩公屬
文帝不能開庠序之美惜哉於是文學武事並皆工絕
猿臂善射膂力過人身八尺四寸鬚長三尺許當心有
赤毫毛三根長三尺六寸太原王渾虛襟友之命子濟
拜焉咸熙中為任子在洛陽晉文帝深待之時東萊王
彌等皆憑結渾又屢言之晉帝帝召見與言大悅之後

謂王濟曰劉元海容貌風儀機談鑒智雖漢金日磾無以加也會父豹卒帝以淵代為左部帥轉寧朔將軍監五部軍事太安中惠帝失政諸王迭相殘廢州郡奸豪所在蜂起從祖北部都尉左賢王劉宣等議曰今司馬氏骨肉相殘興復此時矣左賢王淵姿器絕人幹宇超世天若不恢崇單于終不虛生此人也於是共推劉淵為大單于劉淵曰當為崇岡峻阜何能為培塿乎夫帝王豈有常哉大禹生於西戎文王生於東夷顧惟德所

授耳今見衆十餘萬皆一當晉十鼓行推亂晉猶拉枯
耳上可成漢高之業下不失為魏武何呼韓邪足道哉
宣等稱善元熙元年遷於左國城晉人東附者數萬宣
等上尊號淵曰今晉氏猶在四方未定可仰尊高祖法
且稱漢王權停皇帝之號待宇宙混一當更議之十月
為壇南郊即漢王位晉改永興元年為元熙元年大赦
天下尊蜀後主為孝懷皇帝立高祖以下三宗五祖之
神主而祭之置百官以劉宣為丞相拜授各有差時東

萊王彌起兵青徐二州遣使來降拜鎮東大將軍青州
刺史東萊郡公四月汲桑叛自稱趙王選置州郡十一
月石勒及胡部等帥衆來降永鳳元年七月鳳凰集于
蒲子丞相劉宣等六十四人上尊號十月僭即皇帝位
于南郊大赦改元以世子和為大將軍撫軍總為車騎
大將軍將軍曜為龍驤大將軍和瑞元年遷都平陽汾
水得玉璽大赦改元二年以大司馬梁王和為皇太子
八月淵寢疾以劉洋為太尉延年為太宰司徒總為大

司馬大單于並錄尚書事置單于臺于平陽薨于光極殿
太子和即位聰自西明門入斬和于西室九月葬淵于
永光陵謚曰光文皇帝廟號高祖

劉聰

崔鴻十六國春秋前趙錄曰劉聰字玄明一名載淵第
四子母張夫人之孕夢日入懷寤而告淵淵曰吉徵也
自是十五月而生聰夜有日光之異左耳有一白毫長
二尺餘幼而聰悟究通經書百家之言孫吳兵法靡不

誦之猿臂善射彎弓三百斤膂力驍捷冠絕一時永嘉
四年僭即帝位于光極前殿大赦改元光興元年以衛
尉呼延宴為使持節前鋒大都督配禁兵二萬七千自
宜陽入洛川命東萊王彌劉曜及鎮軍石勒進軍會之
晏進河南趙師前後十二敗晉師長驅圍洛陽陷之聰
兵大掠幽晉帝于端門殺晉太子及百官已下三萬餘
人於洛水北築為京觀遷帝及太后侍中庾珉等于平
陽大赦改元嘉平元年二月內晉帝進號儀同三司會

稽郡公聰引帝入譙謂曰卿為豫章王時朕曾與王武子相造武子示朕於卿卿言聞其名久矣以卿所作樂府歌文示朕謂朕曰聞君善為辭賦試為看之朕時與武子俱為盛德頌卿稱善久之又引朕射于皇堂朕得十二籌卿與武子俱得九籌卿贈朕柘弓銀硯頗憶否帝曰臣安敢忘之但恨爾日不早識龍顏耳聰曰卿家骨肉相殘何其甚也帝曰此殆非人事皇天之意也大漢將應乾受歷故為陛下自相驅除耳且臣家若能奉

武皇之業九族敦睦陛下何由得之三年春正月宴於
光極前殿逼晉帝行酒庾珉王雋等起而大哭聰惡之
二月丁未懷帝崩于平陽於是誅珉等三月立貴嬪劉
氏為皇后四月愍帝即位於長安車騎曜等攻長安河
東地震雨于平陽建元元年正月黑霧四塞著人如墨
五日而止辛未日墮于地又三日相承出於西方東行
平陽地震崇明觀陷為池水赤如血赤氣至天有赤龍
奮迅而去流星起於牽牛入紫微龍形透迤其光照地

落于平陽北十里視之則肉臭聞于平陽長三十步廣二十七步肉旁常有哭聲晝夜不止聰甚惡之癸未劉后產一蛇一虎各害人而走尋之不得頃之見在隕肉之旁己丑劉氏卒乃失此肉哭聲亦止十一月以晉王粲為國相大單于搃百揆十二月宣光陵石人皆行數步宮中鬼哭聲武庫陷入地一丈五尺聰自去冬至是遂不復受朝賀軍國之事一決於粲立市於後庭與宮人宴戲或三日不醒秋七月河東大蝗唯不食粟豆司

隸斬準率部民收而埋之哭聲聞於十餘里後乃鑽土
飛出復食黍豆大司馬曜攻陷長安外城九月大與承
交于宮門有豕著進賢冠昇聰御坐大冠武冠帶綬與
豕並昇俄而鬪死殿上宿衛莫有見其入者長安饑甚
死者過半麴允為粥以供帝膳帝泣曰今窘厄如此外
無救援勢不自知乃使侍中宋敞奉牋降曜敞隨使者
至帝肉袒牽羊輿櫬銜璧出降東門曜受璧焚櫬遷愍
帝及司徒梁汾驃騎麴允等諸臣百餘人至于平陽聰

臨光極殿帝稽顙與颺允伏地大哭扶不能起聽大怒允自叙以帝為光祿大夫懷安侯以大司馬曜假黃鉞大都督陝西諸軍事太宰秦王二年正月東平王約卒十一月聽校獵上林以晉帝行車駕大將軍戎服執戟前導行三驅之禮觀者皆指帝曰此故長安天子聚而觀之故老亦有悲泣者十二月大饗于光極前殿聽欲觀晉臣之意使帝行酒洗爵更衣使帝執蓋多有涕泣或有失聲者尚書郎辛賓起而抱帝大哭引出斬之戊

成愍帝崩於平陽三年聰所居螽斯則百堂災焚其子
會稽王康以下二十一人聰聞自投于牀下自此鬼哭宮中
至于九月夜聲不絕四月尚書令王監崔懿之等極諫
聰大怒收監等殺之秋七月鬼哭于光極殿聰晝見東
平王約甚惡之徵秦王曜為丞相錄尚書事固辭仍以
丞相領雍州牧斬準為大司空領司隸校尉癸亥薨于
建始殿甲子粲即位大赦改元漢昌葬宣光陵諡曰武
皇帝廟號烈宗八月以丞相曜為相國大都督司空斬

準為大將軍領尚書事繁荒耽酒色遊宴後庭軍國之事一決於準準遂勒兵入宮執繁數而殺之追謚靈帝劉氏無少長男子盡刑于市發掘二陵焚燒宗廟鬼大哭聲聞百里準自號漢大王置百官遣使稱藩于晉相國曜自長安赴難

前趙錄曰永嘉元年十二月大將軍東平王約卒一指猶煖遂不殯殮至甲戌乃蘇言見淵於不周山經五日遂復從至崑崙山三日而復反於不周見諸王公卿將

相死者悉在大有人民宮室壯麗號曰蒙誅離國淵謂
約曰東北遮須夷國無主久待汝父為之汝後二年當
來後國中大亂相殺害吾家死亡畧盡但可永明輩數
十人在耳汝且還後年當來見汝不久約拜辭而歸
道過一國曰猗尼渠餘國引約入宮與約皮囊一枚曰
為吾遺漢皇帝約辭而歸謂約曰劉郎後年來必見過
當以女相妻約歸置皮囊於桁上俄而蘇謂左右曰桁
上取囊來左右取得開之有方白玉題文曰猗尼渠餘

國天王敬信遮須夷國天王歲在攝提當相見馳使奏
呈聰曰若審如此吾不懼死也及聰以戊寅歲覺與此
王并葬焉

劉曜

崔鴻十六國春秋前趙錄曰劉曜字永明淵之族子少
孤見養於淵幼而聰慧性拓落高亮雄武過人鉄厚一
寸射而洞之身長九尺三寸手垂過膝生而眉白目有
赤光鬚不過百餘根皆長三尺光初元年十月太保呼

延宴等自平陽來奔上尊號於曜僭即皇帝位十二月
靳準左右軍騎喬泰王騰等殺準奉六璽來降二年夏
四月徙都長安立子熙為皇太子六月繕宗廟社稷南
北郊于長安令曰蓋聞王者之興必禘始祖我皇家之先
出自夏后居于北夷世跨燕朔光文以漢有天下歲久
恩德結于庶民故立漢祖宗之廟以懷民望昭武因循
遂未峻革今欲除宗廟改國號御以大單于為太祖其
議以聞於是太保呼延宴等議曰今宜承晉母子傳號

以光文本封盧奴中之屬城陛下勲功茂於平洛終於
中山中山分野屬大梁趙也宜革稱大趙遵以永行曜
從之於是以冒頓配天淵配上帝三年五月西明門內
大樹風吹折經一宿樹忽然變為人形髮長一尺鬚眉
三寸皆黃白色有歛手之狀亦有兩脚著履之形唯無
目鼻每夜有聲十日而生柯條遂為大樹枝葉甚茂四
年將於霸陵西南營壽陵侍中喬豫和苞上疏諫曰伏
聞敕旨將營建壽陵將周圍四十里下深二十五丈以銅

為棺槨黃金飾之臣聞堯葬穀林市不改肆顓頊葬高陽下不及泉聖王之於終也如是秦始皇下銅三泉周輪七里身亡之後毀不旋踵閻王之於終也如此從喪亂以來漢帝諸陵咸見踐辱唯霸陵獨全此雖太宗之達致然抑亦釋之之功興亡奢儉炯然於前唯陛下覽之矧大悅終南山崩所得白玉之尺有字曰皇王皇王敗趙昌以為已瑞羣臣咸賀中書監劉均曰山崩石壞國傾民亂皇王皇王敗趙昌者此言皇室將為趙所敗

趙因之而昌大趙都於秦雍而勒跨全趙趙昌之應當
在石勒不在我也曜憮然改容五年曜后羊氏卒故晉
惠后也洛陽之陷納之六年正月天裂廣一丈餘長五
十丈十一年七月石虎率衆四萬人寇擾河東進蒲坂
曜選中外精銳自潼關北濟虎懼引師而還曜追而敗
之枕尸一百餘里虎奔朝歌遂攻石生於金墉分遣諸
將攻討汲郡河內十二月勒自帥衆拒之陣於洛西曜
性少醺酒末年尤甚將戰飲數斗常乘赤馬無故踴頻

乃乘小馬北出復飲斗餘至西陽門撓陣就平勒將石
堪因而乘之師遂大潰曜昏醉奔退而馬陷石渠墜於
冰上為堪所執勒將還襄國喻曜使與太子毗書令速
降曜但勒毗與諸臣匡維社稷勿以吾易意建平未為
勒所殺十二年正月太子毗大司馬南陽王肅等議欲
西保秦州遂相率奔上邽石虎乘勝追戰枕尸千里上
邽潰虎執毗及王公已下三千餘人皆殺之自劉淵建
號西河至是二十有六載

晉書載記曰曜在位十年而敗始元海以懷帝永嘉四年僭立至曜三世凡二十有七載以成帝咸和四年滅

太平御覽卷一百十九

欽定四庫全書

太平御覽卷一百二十

宋 李昉等 撰

偏霸部四

後趙石勒

石弘

石虎

石閔

石勒

崔鴻十六國春秋後趙錄曰石勒字李龍上黨武鄉羯

人父周昌朱勒生時赤光滿室白氣自天屬于庭中長而壯健有膽力雄武好騎射幼而力耕每聞鞞鐸之聲或在前後歸以告其母母曰作勞耳鳴非不祥也會并州刺史司馬騰執諸胡山東賣充軍實將詣冀州兩胡一枷勒亦在中東至中原賣與荏平人師權為奴每夜於野嘗聞鼓角之聲諸奴亦聞歸以白權權奇而免之勒與馬牧帥汲桑往來勒以能相馬自託於桑而傭於武安臨水為遊軍所囚會有羣鹿旁過軍人競逐之勒

乃獲免俄而見一老父謂勒曰向羣鹿者我也君應為
中州主故相救耳勒拜而受命遂招集王陽夔安等十
八騎復東如赤龍諸苑中乘苑馬遠掠繒寶以賂汲桑
永興元年關東所在盜起二年陽平人公師蕃等自稱
將軍起兵趙魏衆至數萬勒與汲桑率牧人乘苑馬數
百騎以赴之桑始命勒以石為姓以勒為名永嘉元年
勒歸劉淵拜為輔漢將軍晉平王淵薨聰襲位劉曜王
彌圖洛陽勒帥精騎二萬會之王彌既平洛陽將先誅

勒勒請彌燕于己營手斬彌而并其衆將軍郭墨畧獲
天竺沙門佛圖澄以其有道術見於勒試之有效甚尊重
之前趙嘉平二年張賓說勒曰邯鄲襄國趙之舊都依
山憑險形勢之固可擇此二邑而都然後命將四出授
以奇略王業可圖石勒於是進據襄國聰授勒都督幽
冀并營四川諸軍事冀州牧進封本郡公邑萬戶三年
以征虜將軍為魏郡太守鎮鄴三臺基謀之崩由於此
矣前趙嘉麟元年劉琨遣姚澹帥衆來討勒與戰澹軍

大敗琨長史李弘以并州來降七月劉聰疾甚以勒為
大將軍錄尚書事受遺輔政勒固辭乃止劉曜稱尊號
將授勒太宰大將軍加九錫增封十郡并前二十郡出
入警蹕如曹公輔漢故事曜聞平樂之言停太宰之授
勒大怒曰趙王趙帝孤自取之名號大小豈爾所呼耶
征虜虎與左右長史張敬張賓等上號曰大司馬雖位
冠九台非伯者之號請改稱大將軍大單于領冀州牧
依魏王在鄴故事以二十四郡戶二十九萬為趙國十一

月勒即趙王位建社稷立宗廟以張離等為門生主書
司典胡人出內重其禁法不得侮易衣冠華族號胡為
國人二年令曰國人不聽執嫂及在喪婚娶至於燒葬
令如本俗八月始置軒懸之樂八佾之舞作金根大輅
黃屋左纛天子禮樂於斯備矣三年黎陽民陳武妻產
三男一女上書自陳令曰昔周之興也四乳八子今武
妻一乳四子可謂慶過姬祥美加曩日其賜乳婦一人
穀百石雜繒十四疋庶以肅迎嘉祥冬十月勅親與鄉

老齒坐懽飲語及平生勒曰李陽壯士也孤方取之何以不來父老歸語令速來漚麻池之忿是布衣之恨孤方崇信于天下寧讎匹夫乎令曰武鄉吾之豐沛也其復之三世十一月李陽至勒與酣譔引陽臂笑懽之曰卿雖老臂中猶有力頗復與人鬪孤往日厭卿老拳卿亦飽孤毒手因賜里第一區拜為都尉陽與勒隣居歲長爭漚麻池迭相歐擊四年二月拜子弘為世子勒雅好文學雖在軍旅之中常令儒生讀春秋史漢諸傳而

聽之聞酈食其勸立六國後大驚曰此法當失何以得
成天下至留侯諫乃曰賴有此耳其天資英達類如此
八年八月修三臺三月以世子衛將軍弘鎮鄴太和十
年劉曜圍洛陽襄國大震勒統步騎四萬赴金墉濟自
大碣先是流漸風猛軍至冰泮清和濟畢流漸大至勒
以為神靈之助命曰靈昌津戰于西門曜軍大潰石堪
執曜送之二年曜子熙等去長安奔于上邽車騎虎賁
上邽遣主簿趙封奉傳國玉璽送之秦隴西平建元年

二月車騎石虎等上尊號勒不許固請勒號趙天王行皇帝事大赦八月羣臣又固請以名位不正宜即尊號九月僭即皇帝位大赦改年正月勒南郊有白氣自壇屬天勒大悅四月勒如鄴議營新宮廷尉續咸諫曰臣聞唐虞之治采椽茅茨土階三尺美彰于詩書漢文惜百金不營露臺稱之於千古迨夏商之瓊臺瑤陛楚章華秦阿房資財內竭華夷外叛勒詔曰且勅停作以申吾直臣之氣七月大霖雨中山西北暴水漂流巨木萬餘

根集于堂陽勒大悅謂公卿曰此非為灾天意欲吾營
鄴都耳於是營之勒以成周漢晉舊京欲有移都之意
乃命洛陽為南都置行臺治書侍御史于洛陽以太尉
中山王虎為大司馬程遐為開府儀同三年正月大
饗于建德殿酒酣勒謂徐光曰朕方自古開基何等主
也光對曰陛下神武籌畧過于高皇雄藝卓犖超絕魏
祖三五以來無可比也其軒轅之亞乎勒笑曰人苦不
自知卿言亦已太過朕若逢高皇當北面事之與韓

彭輩競鞭而爭先耳倘遇光武當並驅于中原未知
鹿死誰手大丈夫行事當磊磊落落如日月皎然終不
能如曹孟德司馬仲達欺人孤兒寡婦孤媚以取天下
也朕在二劉之間耳軒轅豈所擬乎羣臣皆稱萬歲四
年雍州刺史石生上言西鄉行有蛇鼠鬪於安定府門
二日蛇死臨涇馬生角長安城中雞鳴音皆曰基慈安
定廳事前後聞誦書聲求之不得七日乃止隕石于肥
鄉六月勒寢疾召中山王虎太子弘中常侍嚴震等侍

疾禁中七月薨于西閣偽謚明皇帝號高祖

晉書曰勒年十四隨邑人行販洛陽倚笑上東門王衍見而異之顧謂左右曰向胡雖吾觀其聲視有奇志恐將為天下之患馳遣收之會勒已去

石弘

崔鴻十六國春秋後趙錄曰石弘字大雅勒第三子母程夫人石光祿遐之妹建平元年立為太子虛衿愛士好為文詠其所親昵莫非儒素勒謂徐光曰大雅惜惜

殊不似將家子光曰漢祖以馬上得天下孝文以玄默
守之聖人之後必世勝殘天之道也勒大悅程遐言於
勒曰中山怏怏不可以輔少主乞早除之以便大計勒
不從勒薨虎執政臨軒收程遐等名子邃將兵入宿衛
文武無不奔散弘大懼策拜中山王虎為丞相以十三
郡封為魏王又加九錫虎偽讓後乃受之延熙元年七
月改頓丘為魏國公魏郡立黎陽十月弘賁璽綬親詣
魏公喻禪意虎曰弘昏昧愚暗處喪無禮不可以君臨

萬國奉承宗廟便當廢之云何禪讓十一月廢弘為海陽王弘就車容色自若幽弘及太后南陽王恢于崇訓宮尋殺之時年二十二

石虎

崔鴻十六國春秋後趙錄曰石虎字季龍勒之從子勒父昌朱幼而字之故或謂之勒弟晉永興中與勒相失嘉平元年劉琨送勒母王及虎于葛陂時年十七性殘忍好馳獵遊蕩無紀度尤善彈數彈人軍中每患之勒怒

之白母王氏曰此兒凶暴無度使軍人殺之聲名可惜不若
自除之母曰健犢走車破轅且當小忍勿便殺也至十八
檢攝恭謹嚴重愛士弓馬迅捷勇冠當時勒深喜焉拜
征虜將軍性酷虐無道軍中勇幹策畧與已侔者輒因
事害之至於降城陷壘坑斬士女鮮有遺類勒屢加責
誨而行意自若然御衆嚴而不煩莫敢犯者指授攻討
所向無前故勒寵信彌隆任以專征之任既廢殺弘稱
居攝趙大王建武元年正月大赦改元虎荒遊廢政外

耽營繕使太子邃還省以書奏事選守牧祀郊廟惟征
伐刑斷乃親覽之四月南遊臨江而還京師大震是月觀
省臺城賜匠有差九月遷都鄴宮三年徙洛陽鍾簏九
龍翁仲等于鄴是歲太武殿東西宮皆就太武殿基二
丈八尺下穿伏室置衛士五百人於其中東西七十五
步南北六十五步皆漆瓦金鐫銀楹金柱珠簾玉壁窮
極伎巧起靈風室九殿於顯陽後選召百官州郡民女
以充之後庭服綺縠玩珍奇者萬餘人內置女官十八

等教官人星占及馬步射置女太史于靈臺仰觀灾祥
以考外太史之虛實禁郡國不得私學星識左校令成
公段造庭燎于崇杠之末高十餘丈上盤置燎下盤置
人絙繳上下虎試而悅之三年太保安夔等文武五百
九人上皇帝尊號安等方入而庭燎油灌下盤死者七
人虎大怒腰斬成公段于閭闔門辛巳即天王位大赦
親王貶為郡公藩王為縣侯太子邃總百揆其後荒酒
淫色驕恣無道或盤遊于田浹旬不返或夜百騎宿于

宮臣家淫其妻妾裝飾宮人美淑者斬首洗血置于盤
上傳共視之又納諸比丘尼有姿色者與之交褻而殺
之合牛羊肉煮而食之亦賜左右所以識其味也虎荒
耽內遊威刑失度遂以事為可呈呈之虎怒曰小事何
足呈也時有所不聞復怒曰何以不呈誚責杖捶月至
再三遂甚恨私謂中庶子李顏等曰官家難稱吾欲行
冒頓之事卿從我乎顏等伏不敢對事發幽遂于東宮
殺之及妃張氏并男女二十六人盡賜死合一棺埋之

誅其宮臣友黨二百餘人立河間公宣為太子建武六年追尊皇考樂平敬公為太宗孝皇帝八年六月上黨孟門上有神人之像坐于山上三日而去虎遣使以太牢祀之九年十二月武鄉送雄虎變為雌產一狼子日噬虎腦而殺之後三日狼子亦死佛圖澄聞之流涕十年虎起河橋於靈昌津採石為中濟石無大小輒隨流用工五日餘不成虎如靈昌津沉壁告誡壁浮于渚水波上騰津所殿觀莫不傾壞壓死者百餘人虎恚甚斬

工匠而還十一年發雍梁十六萬人成長安未央宮既又發豫荆兗二十六萬人成洛陽宮十三年二月虎親耕籍田于桑梓苑十四年三月虎夢龍飛西南自天落地旦問佛圖澄澄曰禍將至矣陛下宜父慈子和深以慎之四月秦公韜起宣光殿于太尉府梁長九丈太子宣視而惡之斬匠截梁而去韜怒增之十丈宣聞之恚甚謂楊杯牟成等曰韜凶豎悖逆敢違我如是汝等能殺之者吾入宮盡以韜之國分封汝等韜既死主上必

其為我乎至戊子而澄卒大寧元年正月虎僭即皇帝
位于郊大赦改年二月有沙門從雍州來稱見佛圖澄
西入關虎掘之無屍唯有一石虎惡之曰石者朕也葬

我而去吾將死矣因而寢疾四月薨於金華殿

晉書曰
季龍始

咸康元年僭立至此太
和六年凡在位十五年

世子即位尊劉后為太后彭城

王遵先鎮關右至是勒兵而還戎卒九萬次于蕩陰石

閭為前鋒都督太后令授遵丞相加九錫增封十郡己

丑至安陽亭貫甲耀兵入自鳳陽門升太武前殿盡哀退

如東閣羣臣敦勸即位大赦封世為譙王邑萬戶廢太
后劉氏為昭儀尋皆殺之世立凡三十三日尊其母鄭
氏為皇太后立妃張氏為皇后大司馬義陽王鑒為太
傅沛王冲為太保石閔為都督中外諸軍事錄尚書事
甲午太武殿災諸門觀閣蕩然其乘御服燒者大半光
燭照天月餘乃滅己未雨血周徧鄴城六月葬虎顯原
陵偽諡武皇帝廟號太祖十一月石閔劫司空李農及
右衛王基密謀共廢遵閔使將軍蘇彥周成帥甲士三

十八人執遵于南臺如意觀遵時方與婦人彈碁問周成等曰反者誰也成曰義陽王鑒當立遵曰我尚如是汝等立鑒復能幾時遂殺之于琨華殿誅鄭太后張皇后遵字大祗虎第九子凡在位者百八十三日鑒即位大赦以石閔為將軍封武德王李農為大司馬鑒使中書令李松殿中將軍張才等夜誅閔農等于琨華殿不克禁中擾亂鑒僞不知夜斬松才於西中華門龍驤將軍孫伏都劉銖等結羯士三千人伏於朝天門亦欲誅

閔等時鑒在中臺伏都帥三十餘人將升臺挾鑒以攻之鑒見而問其故伏都曰閔農等反已在東掖門臣嚴帥衛士謹先啟知鑒曰卿好陳力勿憂無報也伏都等攻閔不尅閔農攻斬伏都等自鳳陽門至琨華橫尸相枕諸胡羯無少長皆斬之死者二十餘萬人于時高鼻多鬚至有濫死者青龍初元年正月石閔欲滅二石之號議曰孔子曰死姓而王七月者七十有三國繼趙李識書炳然且德星鎮衛宜改號大衛復姓冉氏又大赦

閏月改元廢鑒殺之誅虎孫三十八人盡殪石氏鑒在位一百三日鑒字大郎虎第三子也

晉書曰季龍十三子五人為冉閔所殺八人自相殘害初讖言滅石者陵尋而石閔封蘭陵公季龍惡之改蘭陵為武興郡至是終為閔所滅石勒以成帝咸和三年僭立二主四子凡二十三年以穆帝永和五年滅

石閔

崔鴻十六國春秋後趙錄曰石閔字永曾虎之養孫也

父瞻字弘武本姓冉名良魏郡內黃人也其先漢黎陽騎都督累世牙門勒破陳午於河內獲瞻時年十二長而勇悍便弓馬臨陣不顧勒奇之曰此兒壯健可嘉命虎子之歷位左積射將軍封西華侯閔幼而果銳虎撫之如孫及長身長八尺善謀勇力絕人虎即位封為修武侯歷位北中郎將虎之敗於昌黎閔軍獨全由此功名大顯永興元年閔月司徒申鍾司空即閔等四十八人上尊號於閔僭皇帝位於南郊大赦改元號稱大魏

復姓冉氏追尊親隆元皇帝考瞻烈祖皇帝尊母王氏
為太后妻董氏為皇后子智為皇太子以司馬李農為
太宰諸子皆封為縣公新興王祗聞石鑒之死稱尊號
於襄國改年永寧石祗遣相國汝陰王石琨帥衆十萬
伐鄴六月進據邯鄲閔盡衆拒之琨軍大敗二年三月
閔攻襄國百餘日祗怯乃去皇帝之號改稱趙王遣太
尉張奉乞師于慕容雋中軍張春請救於姚弋仲三月
祗相國汝陰王琨自冀州救祗弋仲復遣子襄帥騎三

萬八千雋遣將軍悅綰帥甲士三萬勁卒十三萬四方
攻之祇衛其後閔師大敗閔與千萬騎奔還鄴祇使劉
顯帥衆十萬追奔伐鄴閔盡衆出戰大敗之追奔至於
陽平顯懼密使請降求殺石祇為効四月劉顯殺祇及
其丞相樂安王炳太保張舉等遣拜顯上大將軍大單
于單州牧祇炳皆虎之庶子也七月劉顯稱尊號襄國
三年二月劉顯帥衆伐常山太守蘇彥告難閔帥八千
救彥敗顯于常山追奔及于襄國顯大將軍曹伏駒開

門為應遂入襄國誅顯及其公卿已下百餘人焚襄國
宮室遷其民于鄴三月慕容雋已尅幽薊畧地至于冀
州閔帥騎擊之與慕容恪遇於魏昌城恪方陣而前閔
衆寡不敵所乘赤馬曰朱龍日行千里潰圍東奔行二
十餘里馬無故而死遂為恪所禽送之于薊雋立閔而
問之曰汝奴僕下才何敢妄稱天子閔曰天下大亂爾
曹夷狄人面獸心尚欲篡逆我一時英雄何為不可作
帝王耶雋怒鞭之三百遣慕容評帥衆圍鄴五月送閔

於龍城告鹿麋廟而殺之鄴中飢人相食虎時宮人被
食畧盡冉智尚幼蔣幹遣詹事劉猗奉表降晉八月長
水校尉馬願龍驤將軍田香開門隆評蔣幹懸縋而下
奔于倉垣評送閔后董氏太子智太尉申鍾及諸王公
卿于薊初慕容雋斬閔於遏陁山山左右七里草木悉
枯蝗虫大起自五月不雨至於十二月雋遣使者祀之
謚曰武悼天王其日大雨雹是歲太和八年也

太平御覽卷一百二十

欽定四庫全書

太平御覽卷一百二十一

宋 李昉等 撰

偏霸部五

前燕慕容廆

五罪切

慕容皝

音晃

前燕慕容皝

慕容暉

前秦苻洪

苻健

前秦苻生

前燕慕容廆

崔鴻十六國春秋前燕錄曰慕容廆字奕落環昌黎棘城人昔高辛氏遊於海濱留少子厭次以君北夷世居遼左號曰東胡秦漢之際為匈奴所敗分保鮮卑山因以之為號曾祖莫護跋魏初率其諸部入居遼西從司馬宣王討公孫淵有功拜率義王始建國於棘城之北見燕代少年多冠步搖跋意甚好之遂欽髮襲冠諸部因呼之為步搖其後音訛遂為慕容焉祖木延左賢王

從母丘儉征高麗有功加號大都督父涉歸以全柳城
之勲進拜單于還邑遼東於是漸變胡風自云慕二儀
之德繼三光之容遂以慕容為姓廆身長八尺有大度
晉安北將軍張華一見奇之謂曰君後必為命世之器
定難濟時者也涉歸率弟耐立將謀殺廆廆亡匿於遼東
徐郁家太康五年國人殺耐迎廆立之太康十年又遷
于徒河之青山元康四年定都大棘城所謂紫蒙之邑
也永嘉六年王浚承制以廆為散騎常侍冠軍將軍前

鋒大都督大單于皆讓不受擢舉賢良隨才授任魯國孔纂宿德清望請為賓友平原劉讚儒學該通引為東庠祭酒其世子眇率國胄受業焉太興四年晉遣謁者拜庖使持節都督幽平東夷諸軍事車騎將軍平州牧封遼東郡公丹書鐵券承制海東咸和元年加侍中位特進八年夏五月薨于文德殿年六十五塋于青山晉遣使者贈車騎大將軍開府儀同三司謚襄公眇為燕王追謚武宣王雋稱尊追尊曰武宣皇帝廟號高祖

慕容皝

崔鴻十六國春秋前燕錄曰慕容皝字元貞廐第二子
小字萬年長七尺八寸雄毅善權畧博學多材藝晉建
武元年拜振武將軍永昌初拜左賢王太寧末拜平北將
軍朝鮮公咸和八年六月即遼東公位行平州刺史督
攝部內九年八月晉遣謁者拜皝鎮軍大將軍平州刺
史大單于遼東公承制一如廐故事咸康元年七月立子雋
為世子三年以左司馬封奕為長史九月奕等以皝任

重位輕宜稱燕王於是上議十月僭即燕王位于文德殿大赦境內改脩羣司以封奕為相國追尊先公為武宣王先妣為王后起文昌殿出入警蹕立夫人段氏為王后世子雋為太子是歲棘城黑石谷有大石自立而行八年七月晉使鴻臚郭恡持節拜毖侍中大都督河北諸軍事大將軍燕王其餘官皆如故封諸功臣百餘人九月遷都龍城十二年四月黑龍一白龍一見于龍山毖率羣寮觀之去龍二百步祭以太牢二龍交首嬉

翔解角而去黜大悅赦境內號新宮曰和龍立龍翔佛
寺于山黜雅好文籍親造太上章以代急就又著典誠
十五篇並以教胄子十四年黜親臨東庠考試學生其
通經秀異者擢充近侍十月饗羣僚于承乾殿右長史
宋諺性貪賜布百疋令自負而歸以愧其心十五年八
月黜因見白兔馳射之馬倒被傷輦而還宮引太子雋
囑以後事謂曰今中原未平方須經建委賢任哲此其時
也恪智勇兼濟力堪任重汝其委之以成吾志九月薨

于承乾殿年五十二冬十月葬龍山謚文明王雋稱尊
追尊曰文明皇帝廟號太祖陵曰龍平

晉書曰皝嘗田于西鄙將濟河見一老父服朱衣乘白
馬舉手麾皝曰此非獵所王其還也祕之不言遂濟河
連日大獲後見白兔馳射之馬倒被傷乃說所見輦而
還宮引雋囑以後事以永和四年死在位十五年

慕容雋

崔鴻十六國春秋前燕錄曰慕容雋字宣英皝第二子

小字賀賴跋十二月而生有神光之異身長八尺一寸
善屬文雅長辭賦至於器物車室皆著讚以為勸戒眇
之八年晉遣使者拜眇燕王以雋為安北將軍東夷校
尉十一年進拜使持節鎮東將軍眇薨即燕王位赦其
境內元年春正月雋依春秋列國故事稱元年正月間
趙魏大亂乃嚴兵將為進取之計七月晉使謁者陳沈
拜雋侍中都督河北諸軍事幽冀并平四州牧大將軍燕王
承制封拜一如虜眇故事元璽元年正月司南車成雋

大悅告于鉞廟四月遣輔國恪相國奕討冉閔戰于魏昌廣臺閔師大敗擒送之閔大將軍蔣幹輔閔子智固守鄴城遣輔弼評等帥騎一萬以討之鄴北郡縣悉降輔國奕等一百一十人勸稱尊號令曰非常之事匪寡德所宜聞也八月尅鄴輔弼評等送閔妻董氏太子智太尉申鍾井乘輿服物及六璽送于中山傳國璽蔣幹先以送晉雋欲神其事業言數在已乃詐云閔妻得之以獻賜閔妻號奉璽君封冉智為海濱侯以輔弼評為司州刺

史鎮鄴十月輔國恪等五百五人奉皇帝璽上尊號十一月僭
即皇帝位于正陽前殿大赦改元時晉遣使詣雋謂之
曰還白汝天子我承人之為中國所推已為帝矣庚午
下令曰追崇祖考古人令典其追尊武宣王為高祖武宣皇
帝文明王為太祖文明皇帝二年正月立后可足渾氏
為皇后升平元年正月復立中山王暉為皇太子赦其
境內改元曰光壽初廐有駿馬曰赭白有奇相逸力石
虎之伐棘城孰將出避難欲乘之馬悲鳴蹄齧人莫能

近銑曰此馬見異先朝孤嘗仗之濟難今不欲出者蓋先君之旨也乃止虎尋奔退銑益奇之至是年四十九歲而駿逸不虧雋比之鮑氏驄命鑄銅以圖其像親為銘讚鐫勒其旁置之薊城東掖門是月像成而馬死十一月自薊遷鄴十二月入鄴宮大赦繕宮殿復銅雀臺以吳王垂為東夷校尉平州刺史鎮遼東二年三月常山寺大樹自拔根出得壁二十七圭七十三光色精奇有異常玉雋以為岳神之命遣尚書郎段勤以太牢祀之五

月遼西獲黑兔三年三月雋夜夢石虎齧其臂寤而惡
之命發其墓剖棺出屍踏而罵之曰死胡安敢夢生天
子遣御史中尉楊約數其殘酷之罪鞭而投之漳水十
二月雋寢疾謂大司馬恪曰吾患懞頓恐不濟修短命
也復何所恨但二寇未除景茂冲幼慮其未堪家國多
難吾欲遠追宋宣以社稷屬汝恪曰太子雖幼天縱聰
聖必能勝殘刑措不可以亂正統雋怒曰兄弟之間豈
虛飾乎恪曰陛下若以臣堪荷天下之任者寧不能輔

少主也雋曰若汝行周公之事吾復何憂四年正月雋薨于應福前殿年五十三偽諡景昭皇帝廟號烈祖葬龍陵雋雅好文籍性嚴重未曾以慢臨朝雖閒居宴處亦無懈怠之色

晉書曰雋在位十一年自初即位至于末年講論不倦覽政之暇唯與侍臣錯綜義理凡所著述四十餘篇也

慕容暉

崔鴻十六國春秋前燕錄曰慕容暉字景茂雋之第三

子元璽三年封中山王尋立為皇太子光壽四年僭即
帝位大赦改元建熙元年以太原王恪為太宰錄尚書
行周公事專百揆上庸王評為太傅贊朝政司空陽鷲
為太保吳王垂為河南大都督十州諸軍事兗州牧鎮
梁國五年正月暉南郊十月太尉奕迎神主和龍初暉
委政太宰恪專受經于博士王勸助教尚鋒秘書郎杜
詮並以明經講論左右至是通諸經祀孔子于東堂以
勸為國子祭酒鋒國子博士詮散騎侍郎其執經侍講

皆有拜授八年太宰恪卒九年十二月有神降于鄴自稱湘女有聲與人相接數日而去十年四月立貴妃可足渾氏為皇后六月晉大司馬桓溫率衆五萬來伐遂至枋頭吳王垂大敗之斬獲三萬餘級溫奔還淮南垂既敗溫威德彌振太傅評大不便之太后遂與評謀殺垂十二月垂出奔秦十一年六月秦輔國將軍王猛鎮南將軍楊安率衆六萬來伐以太傅評下邳王屬等帥精兵三十萬拒秦師于潞川州郡盜賊大起鄴中怪異非

常十月評及猛戰于潞川評師敗績單騎遁還猛乘勝
追奔長驅至鄴十一月苻堅帥衆會猛來攻拔鄴城外亂
散騎侍郎餘蔚等率扶餘高句麗及上黨質子五百
餘人夜開城門引納秦師暉與太傅評左衛將軍孟高
等數十騎出奔昌黎堅遣將軍郭慶帥騎五千追之及
暉于高陽秦將巨武執暉將縛之暉曰汝何小人而敢
縛天子武曰我梁山巨武受詔縛賊何謂天子耶執暉
送鄴堅問其奔狀暉曰孤死首丘欲歸死于先人陵墓

耳堅哀而釋之令還宮率文武出降堅入鄴宮升正陽殿徙暉及王公已下并諸鮮卑四萬餘戶于長安封暉新興郡侯邑五千戶尋拜尚書堅征臺城為平南將軍別部都督淮南之敗隨堅還長安既而吳王垂攻苻丕于鄴中山王冲起兵關中暉謀殺堅事發為堅所誅年三十五德僭稱尊號偽謚幽皇帝

晉書曰庖以武帝太康六年稱公至暉四世暉在位十一年以海西公太和五年滅庖孰凡八十五年

前秦苻洪

崔鴻十六國春秋前秦錄曰苻洪字廣世洛陽臨渭氏人其先有扈氏之苗裔子孫強盛世為氐酋其後家池生蒲長五丈節如竹形于時咸異之謂之蒲家因以為氏焉父懷歸為部落小帥母姜氏寢產洪先是隴右大雨霖百姓苦之謠曰雨若不止洪水必起故名之曰洪年十二父卒代為部帥好施多權畧善騎射屬劉氏之亂乃散千金招延俊傑戎晉襁負奔之權為盟主劉聰

遣使拜平遠將軍不受自稱護氏校尉秦州刺史洛陽
公羣氏推為首劉曜以洪為氐王及曜敗于洛陽洪率
部人西保隴山石虎將軍攻上邽洪詣虎降虎跣出迎
之拜冠軍將軍監六夷諸軍事涇陽伯趙建平四年石
生起兵于關中洪遂西結張駿自稱晉北平將軍雍州
刺史石虎既滅生洪率戶二萬下隴東如馮翊虎拜洪
護氏校尉進爵為侯徙秦雍州民羌十餘萬戶于關東
遷洪龍驤將軍流民都督處于枋頭從征段遼有功進

封平西郡公佛圖澄觀苻氏有王氣虎陰欲殺之洪稱疾不朝太寧元年進位侍中車騎大將軍開府儀同三司雍州刺史改封本國略陽郡公時姚弋仲圖據關中恐洪先之遣子襄率衆五萬來伐洪洪迎擊敗之於是安定梁擾等並率關西民望說洪曰今胡運將終中原喪亂明公神武必成大業繼蹤周漢宜稱尊號以副四海之望洪以識文有草付應王又孫堅之生背有草付字遂改姓苻氏自稱大將軍大單于三秦王初趙將軍

麻秋西鎮枹

符音

罕聞冉閔之亂率衆歸鄴洪使子龍驤

雄逆擊獲之以秋為軍帥將軍秋說洪西都長安既而
秋因讎鳩洪將併其衆世子健收而殺之洪將死謂健
曰關中周漢舊都形勝之國吾亡之後便可鼓行而西
言終而薨年六十六

苻健

崔鴻十六國春秋前秦錄曰健字運業洪第三子母羌
氏夢感大羆而孕生之夜洪又夢族胄氏王蒲健謂之曰

是兒興家門可以吾名字之於是名熙字世健後避石虎
外祖張羆之名故改焉晉永和六年自稱征西大將軍
開府都督關西諸軍事雍州刺史於是盡衆西行至孟
津起浮橋以濟濟訖焚橋三輔堡壁悉降十一月入都
長安于是左長史賈玄碩等請依昭烈稱漢中王故事表健
為秦王繼而又請上尊號健偽讓再乃從之皇始元年
正月僭即天王位國號大秦改晉永和七年為皇始元
年追尊父洪為太祖武惠皇帝繕宗廟社稷于長安妻

强氏為皇后子長為皇太子親為平原公生為淮南公
弟雄丞相東海公其餘封受各有差是年野蠶成繭野
禾被原百姓採野繭而衣收野粟而食關西家給人足
二年正月丞相雄等固請宜依漢晉兼皇王之美不可
過自謙冲同趙之初號健從之僭即皇帝位于太極殿
大赦諸公進爵為王立五等之封以次進之三年正月
下書曰公卿已下歲舉賢良方正孝廉清才多畧博學
秀才異行各一人或獻書規諫或面陳朕過其速以聞

勿拘貴賤四年丞相東海王雄卒贈相國進封魏王謚
敬武王雄字元才洪之季子趙建武中拜龍驤將軍雄
頭大足短故軍中稱為大頭龍驤健甚重之曰元才吾
之周公五年四月立淮南王生為皇太子六月健寢疾
引太師魚遵丞相雷弱兒太傅毛貴司空王墮等囑以
後事受遺輔政乙酉薨于太極前殿年四十九葬原陵
偽謚明皇帝廟號世宗永興初追尊曰景明皇帝廟號
高祖

苻生

崔鴻十六國春秋前秦錄曰苻生字長生健第三子幼而羸暴昏醉無賴祖洪甚惡之生一目七歲洪戲之問侍者曰吾聞瞎兒一淚信乎侍者曰然生怒引佩刀自刺出血曰此亦一淚也洪大驚鞭之生曰性耐刀槩不堪鞭捶洪曰汝為爾不已吾將以汝為奴生曰可不如石勒也及長力舉千鈞走及奔馬皇始五年僭即皇帝位大赦改年羣臣奏先帝晏駕爾不宜改號生怒不

從窮推議主壽光元年七月殺右僕射段純以太子門
大夫趙韶為右僕射太子舍人趙誨為中護軍著作佐郎
董榮為尚書並以佞倖進也九月中書監胡文中書令
王魚言于生曰比頻有客星孛于大角熒惑入于東井
大角為帝座東井秦之分野不出三年國有大喪大臣
戮死願陛下遠追周文脩德以禳之生曰皇后與朕對
臨天下亦足以塞大喪之變於是殺皇后梁氏誅太傅
錄尚書毛貴車騎尚書令梁楞左僕射梁安后安之女

孫又誅丞相雷弱兒諸羌悉叛弱兒南安羌酋也生雖
在諒闇遊飲荒淫殺戮無道彎弓露刃以見朝臣錘鉗
鋸鑿備置左右未幾后妃公卿已下至于僕隸誅五百
餘人二年正月嬖臣右僕射董榮言于生曰日蝕之災
宜以貴臣應之生曰唯有大司馬國之懿戚不可其在
王司空乃誅司空王墮壬戌饗羣臣于太極前殿
飲酒樂奏生歌以和之命尚書令辛牢與勸旣而怒曰
何不強酒猶有坐者引弓矢射牢殺之於是百僚大懼

無不引滿昏醉汚服失冠蓬頭僵仆生以為樂三年四月姚襄遣姚蘭帥衆二萬七千進據黃洛生遣廣平王黃眉東海王堅連節將軍鄧羌等步騎萬五千以討之羌偽不勝引騎而退襄追之至於三原羌迴騎拒襄大戰獲襄襄有駿馬日行千里是戰也馬倒而擒之眉等振旅而歸初長安謠曰東海大魚化為龍男便為王女為公問在何所洛門東生荒暴日滋殘虐彌甚羣臣朝謁漏盡請見生曰日知盡乎須待飲訖罕有見者或曰

暮不出百僚饑弊或至申酉乃出臨朝輒怒色厲聲惟
行殺戮連月昏醉弗堪省覽或使宮人與男子裸交於
殿前引羣臣臨而觀之或生剝牛羊驢馬活爛雞鴨數
十為羣放之殿前或生剝死囚面皮令其歌舞觀以為
樂宗室勲舊親戚忠良殺害畧盡朝士奔走草野皆曰
從虎口出左右得度一日如過十年至於截脛剝胎拉
脇鋸頭殺者動有千數生夜對侍婢曰阿法兄弟亦不
可信明當除之是夜清河王符法夢神告曰旦將禍集

汝門惟先覺可以免之寤而心悸會侍婢來告乃與特
進梁平老強汪等帥壯士數百人潛入雲龍門東海王
堅與呂婆樓帥麾下三百餘人鼓噪繼進宿衛將士皆
捨仗歸堅生猶昏寢不寤堅衆既至生驚問左右曰此
輩何等人堅引生置別室廢為越王俄而殺之時年二
十三偽諡厲王封子馮為越王

太平御覽卷一百二十一